

Na osnovu člana 35. stav (2) i člana 36. stav (2) Zakona o naftnim derivatima u Federaciji Bosne i Hercegovine ("Službene novine Federacije BiH", br. 52/14 i 49/25), a u vezi sa članom 22. Odluke o kvalitetu tečnih naftnih goriva ("Službeni glasnik BiH", broj: 10/24), federalni ministar energije, rudarstva i industrije donosi

PRAVILNIK O UTVRĐIVANJU KVALITETA TEČNIH NAFTNIH GORIVA

DIO PRVI – OSNOVNE ODREDBE

Član 1.

(Predmet)

Ovim Pravilnikom propisuje se program i postupak utvrđivanja usklađenosti kvaliteta tečnih naftnih goriva, u skladu sa Zakonom o naftnim derivatima u Federaciji Bosne i Hercegovine ("Službene novine Federacije BiH", br. 52/14 i 49/25 – u daljem tekstu: Zakon), te u skladu sa Odlukom o kvalitetu tečnih naftnih goriva ("Službeni glasnik BiH", br. 10/24 - u daljem tekstu: Odluka).

Član 2.

(Definicije pojedinih izraza)

Definicije i skraćenice termina koji se koriste ovim pravilnikom, su sljedeće:

- a) "Dobavljač tečnih goriva" (u daljem tekstu: Dobavljač) je pravno lice koje tečna goriva proizvodi, uvozi i/ili daje u promet i koristi za sagorijevanje radi proizvodnje toplinske energije;
- b) "Energetski subjekt" je pravno lice sa sjedištem u Federaciji Bosne i Hercegovine koje je upisano u sudski registar, i/ili podružnice registrovane u skladu sa Zakonom o registraciji poslovnih subjekata u Federaciji Bosne i Hercegovine ("Službene novine FBiH", br. 27/05, 68/05, 43/09, 63/14, 32/2019 - odluka Ustavnog Suda i 85/21), kojima je Porezna uprava Federacije Bosne i Hercegovine dodijelila identifikacioni broj, a koji obavlja jednu ili više energetskih djelatnosti u sektoru naftne privrede;
- c) "Inspekcijsko tijelo" je pravno lice koje ocjenjuje usklađenost kvaliteta tečnih naftnih goriva sa Odlukom i Zakonom, a koja se stavljaju u promet na tržištu Bosne i Hercegovine;
- d) "Naftni derivati" su proizvodi dobijeni rafinacijom iz sirove nafte (motorni benzini, benzini za zrakoplove, dizel-goriva, gasna ulja, ulja za loženje, brodska goriva, gorivo za mlazne motore, petroleji, bitumeni, naftni koks i LPG);
- e) "Kvalitet naftnih derivata" je kvalitet goriva određen fizičko-hemijskim osobinama goriva i graničnim vrijednostima dozvoljenih količina ukupnog sumpora, olova, ukupnih aromata, benzena, polihlorisanih bifenila i najmanje, odnosno najveće vrijednosti drugih karakteristika kvaliteta tečnih proizvoda;
- f) "Ministarstvo" je Federalno ministarstvo energije, rudarstva i industrije;
- g) "Monitoring" je praćenje kontrole kvaliteta i količina naftnih derivata;
- h) "Kupac" je svako pravno i svako fizičko lice - poduzetnik registrovano za obavljanje djelatnosti kod nadležnog organa i koji naftne derivate koristi:
 - 1) za pretvaranje u toplotnu ili
 - 2) za pretvaranje u mehaničku energiju i posjeduje internu stanicu za snabdijevanje gorivom, ili
 - 3) u tehnološkom procesu proizvodnje.
- i) LPG je tečni naftni gas.

DIO DRUGI - KONTROLA USKLAĐENOSTI KVALITETE GORIVA

Član 3. (Program)

- (1) Programom se propisuje obim monitoringa kvaliteta svih vrsta tečnih goriva i LPG-a za svakog dobavljača/energetskog subjekta/kupca posebno, kao i dinamika provođenja istog.
- (2) Programom se utvrđuje postupak uzorkovanja tečnih naftnih goriva.

Član 4. (Kontrola usklađenosti kvaliteta)

- (1) Kontroli usklađenosti kvaliteta goriva podliježu sva tečna naftna goriva koja se na teritoriji Federacije Bosne i Hercegovine (u daljem tekstu: Federacije BiH) koriste u motorima sa unutrašnjim sagorijevanjem, kao i goriva koja koriste kupci za namjene utvrđene Zakonom i ovim Pravilnikom.
- (2) Kontroli kvaliteta goriva podliježu i interne stanice za snabdijevanje gorivom.
- (3) Kontrolu provođenja programa, po dinamici iz člana 10. stav (1) ovog Pravilnika, obavlja Federalna uprava za inspekcijske poslove.

Član 5. (Izuzeci od primjene)

Odredbe ovog Pravilnika ne primjenjuju se na tečna naftna goriva:

- a) koja su namijenjena za potrebe istraživanja i ispitivanja;
- b) koja su namijenjena za preradu prije konačnog izgaranja; i
- c) koja će biti prerađena u rafinerijskoj proizvodnji u BiH.

Član 6. (Broj uzoraka)

- (1) Broj uzoraka na sezonu raspoređuje se na dobavljače/energetske subjekte/kupce srazmjerno njihovom udjelu u prodaji/potrošnji pojedinačnih tečnih energenata i LPG-a u prethodnoj godini i u obimu utvrđenom u Tabeli broja uzoraka po sezoni.
- (2) Broj uzoraka za kontrolu usklađenosti kvaliteta utvrđuje se na osnovu prometovanih količina u protekloj godini, koji se utvrđuje u skladu sa obimom monitoringa preciziranim Odlukom i u skladu sa stavom (1) ovog člana.
- (3) Broj uzoraka za kontrolu usklađenosti kvaliteta goriva u internim stanicama utvrđuje se na osnovu prometovanih količina u protekloj godini, i u skladu sa obimom monitoringa preciziranim Odlukom i ovim Pravilnikom.
- (4) Ukupan broj uzoraka jednog energenta, definisanih programom, proporcionalno će se rasporediti na akreditovana i ovlaštena inspekcijska tijela u skladu sa obimom akreditacije ispitnih laboratorija.
- (5) Tabela broja uzoraka po sezoni je sastavni dio ovog Pravilnika.

Član 7. (Raspored kontrole usklađenosti)

- (1) Kontrola usklađenosti kvaliteta goriva po zahtjevima ovog programa se odvija pri uvozu tečnih naftnih goriva, transportu tečnih naftnih goriva, stavljanju tečnih naftnih goriva u promet, slučajevima kada se tečna naftna goriva koriste za sagorijevanje radi neposredne proizvodnje toplotne energije, i u slučajevima kada kupci koriste naftne derivate kako je to propisano Zakonom ili za vlastite potrebe u količini koja prelazi 100 t/godišnje.
- (2) Kontrola usklađenosti kvaliteta goriva iz stava 1. ovog člana vrši se u skladu sa važećom zakonskom regulativom, i u omjeru:
 - 30 % od ukupnog broja uzoraka utvrđenog u Tabeli uzoraka iz člana 6. stav (5) ovog Pravilnika na granici Bosne i Hercegovine prilikom carinjenja za svakog dobavljača koji se

bavi uvozom i/ili transportom tečnih naftnih goriva do terminala /benzinske stanice i u skladu sa zahtjevima ovog programa;

- 70 % od ukupnog broja uzoraka utvrđenog u Tabeli uzoraka iz člana 6. stav (5) ovog Pravilnika u skladu sa zahtjevima ovog programa.

(3) Za sve ostale dobavljače/energetске subjekte/kupce tečnih naftnih goriva primjenjuju se odredbe programa na način kako je to regulisano ovim Pravilnikom.

Član 8.

(Obaveze dobavljača/energetskih subjekata/kupaca)

(1) Za sve vrste tečnih goriva koja se proizvode, uvoze i/ili stavljaju u promet dobavljači/energetski subjekti/kupci su dužni obezbijediti izvođenje postupka utvrđivanja usklađenosti kvaliteta tečnih goriva.

(2) Ukoliko se dobavljač/energetski subjekt/kupac, vlasnik interne stanice za snabdijevanje gorivom, koji naftne derivate i LPG koristi za vlastite potrebe u količini koja prelazi nivo od 100 tona/godišnje, ne nalaze na popisu datom u Tabeli broja uzoraka na sezonu dužan je, po nalogu nadležnog inspektora Federalne uprave za inspeksijske poslove - Federalni rudarsko, termo i elektro-energetski inspektorat (Tehnička inspekcija), obezbijediti inspeksijskom tijelu izvođenje postupka utvrđivanja usklađenosti kvaliteta tečnih goriva.

(3) U slučajevima kada dobavljač odbije da obezbijedi izvođenje postupka iz stava (1) ovog člana ili se utvrdi odstupanje od propisanog kvaliteta, nadležni inspektor Federalne uprave za inspeksijske poslove dužan je postupiti u skladu sa svojim nadležnostima propisanim Odlukom i Zakonom.

Član 9.

(Inspeksijsko tijelo)

(1) Monitoring kontrole usklađenosti kvaliteta goriva provodi inspeksijsko tijelo koje koristi usluge akreditovane laboratorije, koja ima sjedište na teritoriji Federacije BiH.

(2) Dokaze o ispunjenosti uslova za ocjenjivanje usklađenosti kvaliteta tečnih naftnih goriva Inspeksijska tijela su dužna dostaviti Ministarstvu.

(3) Dokazi iz stava (2) ovog člana obavezno sadrže: Rješenje Ministarstva vanjske trgovine i ekonomskih odnosa o imenovanju inspeksijskog tijela za ocjenjivanje usklađenosti kvaliteta tečnih naftnih goriva, Potvrda o akreditaciji za inspeksijsko tijelo izdata od Instituta za akreditaciju BiH i Potvrda o akreditaciji za ispitnu laboratoriju, koja ima sjedište na teritoriji Federacije BiH, izdata od Instituta za akreditaciju BiH, sa obimom područja akreditacije.

(4) Inspeksijsko tijelo koje će provoditi monitoring kontrole usklađenosti kvaliteta goriva dužno je dostaviti Izjavu odgovornog lica da će monitoring provoditi u skladu sa odredbama Odluke, Zakona i podzakonskih akata iz ove oblasti i Izjavu odgovornog lica da su ispunjeni svi uslovi za ocjenjivanje usklađenosti kvaliteta tečnih naftnih goriva uključujući i izbor ovlaštene ispitne laboratorije na način da ista mora biti akreditirana u obimu koji se zahtjeva standardima na osnovu kojih se ispituje uzorak za svaku vrstu goriva pojedinačno, te navesti za koju vrstu goriva namjerava vršiti monitoring.

(5) U slučaju da Inspeksijsko tijelo iz bilo kojih razloga želi odustati od provođenja monitoringa dužno je, u roku od sedam dana, o istom obavijestiti Ministarstvo.

Član 10.

(Dinamika provođenja monitoringa)

(1) Dinamiku provođenja monitoringa definisanu po dobavljaču/energetskom subjektu/kupcu, energentu, broju uzoraka i inspeksijskom tijelu utvrđuje Ministarstvo najmanje jednom mjesečno i dostavlja Federalnoj upravi za inspeksijske poslove – Federalni rudarsko, termo i elektro-energetski inspektorat (Tehnička inspekcija).

(2) Na osnovu dinamike provođenja monitoringa Federalna uprava za inspeksijske poslove dostavlja inspeksijskim tijelima naredbu za uzimanje uzoraka.

(3) Ukupan broj uzoraka jednog energenta, definisanih programom, proporcionalno će se rasporediti na akreditovana i ovlaštena inspekcijska tijela u skladu sa obimom akreditacije ispitnih laboratorija.

(4) Ukoliko iz objektivnih razloga Ministarstvo nije u mogućnosti propisati sve dinamike provođenja monitoringa utvrđenih u tabeli broja uzoraka za određenu sezonu, Ministarstvo će propisati dinamike koje je moguće provesti, pri tome vodeći računa da broj uzoraka u dinamikama bude raspoređen proporcionalno broju uzoraka utvrđenih tabelom za određenu sezonu.

Član 11.

(Troškovi izvođenja postupka)

(1) Troškove izvođenja monitoringa snosi dobavljač/energetski subjekt/kupac o čemu sklapa ugovor sa nadležnim inspekcijskim tijelom ili istom izdaje drugi odgovarajući akt, uvažavajući odredbe člana 10. stava (1) ovog Pravilnika.

(2) Dobavljači/energetski subjekti/kupaci, kao i dobavljači iz člana 7. stav (3) ovog Pravilnika, nemaju mogućnost izbora inspekcijskog tijela i dužni su dozvoliti uzorkovanje propisano članom 10. stav (1) ovog Pravilnika.

Član 12.

(Uvjerenje o usklađenosti)

(1) Nakon provedene laboratorijske analize uzorka tečnih naftnih goriva, inspekcijsko tijelo izdaje dobavljaču Uvjerenje o usklađenosti kvaliteta tečnih naftnih goriva.

(2) Uvjerenje iz stava 1. ovog člana izdaje se najkasnije osam dana od dana uzorkovanja tečnih naftnih goriva.

Član 13.

(Izveštaj o izvršenoj kontroli)

(1) Izveštaj o provedbi dinamike provođenja monitoringa za prethodni mjesec, u kome se navodi ime dobavljača, mjesto-lokacija, datum uzorkovanja, energent i rezultat utvrđivanja usklađenosti kvaliteta tečnih goriva, inspekcijska tijela dostavljaju Ministarstvu i Federalnoj upravi za inspekcijske poslove najkasnije do 7. u tekućem mjesecu.

(2) Prilikom obavljanja poslova kontrole kvaliteta goriva inspekcijska tijela su dužna, Ministarstvu i Federalnoj upravi za inspekcijske poslove, dostavljati informacije, sve podatke uključujući i dokumentaciju o činjeničnom stanju na terenu koje su u suprotnosti sa Zakonom i ovim Pravilnikom.

(3) U slučaju da inspekcijsko tijelo utvrdi neusklađenost goriva sa zahtjevima propisanim Zakonom i Odlukom, dužno je odmah o tome obavijestiti Ministarstvo i Federalnu upravu za inspekcijske poslove – Federalni rudarsko, termo i elektro-energetski inspektorat (Tehnička inspekcija), radi nadležnog postupanja.

(4) U slučajevima iz stava (3) ovog člana, Federalna uprava za inspekcijske poslove – Federalni rudarsko, termo i elektro-energetski inspektorat (Tehnička inspekcija) dužna je o tome obavijestiti i Federalni tržišni inspektorat (Inspektorat tržišno-turističke inspekcije), radi nadležnog postupanja i primjene matrijalnog prava po osnovu Zakona o unutrašnjoj trgovini ("Službene novine Federacije BiH", broj: 87/24).

(5) O poduzetim radnjama, po pitanjima iz st. (2), (3) i (4) ovog člana, Federalni rudarsko, termo i elektro-energetski inspektorat (Tehnička inspekcija) i Federalni tržišni inspektorat (Inspektorat tržišno-turističke inspekcije), dužni su odmah obavijestiti Ministarstvo.

Član 14.

(Kvalitet utvrđen standardima)

(1) Naftni derivati koji se uvoze i/ili stavljaju u promet na teritoriji Federacije BiH moraju zadovoljavati kvalitet utvrđen standardima:

- a) bezolovni motorni benzini - BAS EN 228+A1:2018,
- b) dizel-goriva - BAS EN 590+A1:2018,

c) lož-ulje ekstra lako "LUEL" - BAS 1002:2014,

d) lož-ulje lako specijalno "LS", srednje "S" i teško "T" moraju zadovoljavati fizičko hemijske karakteristike definisane važećim standardima i Odlukom,

e) LPG za upotrebu u automobilima BAS EN 589:2020 i

f) LPG za upotrebu u industriji i domaćinstvima BAS 1056:2023.

g) petrolej za loženje i petrolej za rasvjetu moraju zadovoljavati fizičko-hemijske karakteristike definisane Odlukom.

(2) Naftni derivati koji se prodaju na tržištu mogu sadržavati biokomponente u skladu sa propisima o kvalitetu naftnih goriva i drugim propisima koji su na snazi u Federaciji BiH.

(3) Energetski subjekti koji uvoze i/ili stavljaju u promet naftne derivate iz st. (1) i (2) ovog člana dužni su, uz navedeno gorivo, priložiti dokumente definisane Odlukom.

(4) Energetskim subjektima koji uvoze i/ili stavljaju u promet naftne derivate iz st. (1) i (2) ovog člana dozvoljeno je korištenje sredstava za poboljšanje parametara goriva (aditiviranje) u skladu sa Odlukom i provedbenim propisima.

(5) Energetski subjekti koji koriste sredstva za poboljšanje parametara goriva iz stava (4) ovog člana dužni su pored dokumenata definisanih Odlukom priložiti i Izjavu o aditivima propisanu Upustom o načinu provođenja Odluke ("Službeni glasnik BiH", broj: 51/24).

(6) Osim goriva sa graničnim vrijednostima definisanim važećim standardima čija primjena je obavezna, na tržištu se mogu naći i goriva višeg kvalitetnog nivoa u skladu sa Odlukom.

Član 15.

(Označavanje pumpnih automata)

(1) Svi pumpni automati koji se koriste za isporuku tečnog naftnog goriva moraju biti obilježeni u skladu sa zahtjevima standarda BAS EN 16942.

(2) Naljepnice na pumpnim automatima moraju biti u skladu sa propisanom formom iz Priloga I Odluke (Obilježavanje pumpnih automata za bezolovne motorne benzine, Obilježavanje pumpnih automata za dizel goriva i Obilježavanje pumpnih automata za gasovita goriva).

(3) Oznake moraju biti ispisane crnim slovima na bijeloj ili srebrnoj podlozi poštujući formu i dimenzije kako je ranije navedeno.

Član 16.

(Utvrdjivanje usklađenosti)

(1) Utvrđivanje usklađenosti kvaliteta goriva po zahtjevima ovog Programa će se raditi do 30.09.2025.g. (ljetni period).

(2) Po isteku ovog programa Ministarstvo će donijeti program za zimski period.

Član 17.

(Sastavni dio pravilnika)

Tabela broja uzoraka za ljetni period je sastavni dio ovog Pravilnika.

Član 18.

(Kvalitet LPG-a)

(1) LPG koji se uvozi i/ili stavlja u promet na teritoriji Federacije BiH mora zadovoljavati kvalitet utvrđen standardom iz člana 14. tač. e) i f) ovog Pravilnika.

Član 19.

(Broj uzoraka LPG)

(1) Broj uzoraka LPG na sezonu raspoređuje se na dobavljače/energetske subjekte/kupce srazmjerno njihovom udjelu u prodaji/potrošnji LPG u prethodnoj godini.

(2) Broj uzoraka LPG koji se uzimaju na skladištima dobavljača ili na lokaciji konačne upotrebe LPG-a u obimu 1 uzorak na 100 tona.

(3) Monitoring kontrole usklađenosti kvaliteta LPG provodi inspeksijsko tijelo koje ispunjava uslove za ocjenjivanje usklađenosti kvaliteta LPG.

DIO TREĆI - ZAVRŠNE ODREDBE

Član 20.

(Prestanak primjene)

Stupanjem na snagu ovog pravilnika prestaje primjena Pravilnika o utvrđivanju kvaliteta tečnih naftnih goriva ("Službene novine Federacije BiH", br. 107/14; 69/15; 3/16; 66/16; 7/17; 58/17; 7/18; 58/18; 7/19; 15/20; 59/20; 2/21; 64/21; 4/22; 59/22; 6/23; 51/23 i 96/23), koji je u dijelu primjene Odluke o kvalitetu tečnih naftnih goriva ("Službeni glasnik BiH", br. 27/02, 28/04, 16/05, 14/06, 22/07, 101/08, 71/09, 58/10 i 73/10) stavljen van snage stupanjem na snagu Odluke o kvalitetu tečnih naftnih goriva ("Službeni glasnik BiH", broj: 10/24).

Član 21.

(Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

Broj: 05-02-1-1237/25
25. juli 2025. godine
Mostar

MINISTAR

Vedran Lakić, s.r.

